

Հայ Օգնության Միության Գանատայի 92-րդ և Գանատայի Շրջանի 22-րդ  
Պատգամաւորական ժողով

Հայ Օգնության Միության Գանատայի 92-րդ և Գանատայի Շրջանի 22-րդ Պատգամաւորական ժողովը տեղի ունեցաւ 26-27-28 Յունիս 2015-ին, Մոնթրէալի Հայ կեդրոնէն ներս, մասնակցութեամբ Գանատայի շրջանի 9 մասնաճիւղերու և բանաւոր բացակայութեամբ Ռուբինա «Ուինձըր» մասնաճիւղի:

Ժողովը բացուեցաւ Ուրբաթ յետմիջօրէին ներկայութեամբ Գանատայի Հայոց Թեմի Բարեջան Առաջնորդ Գերշ. Տէր Մեղրիկ Եպս. Բարիքեանի, ՀՕՄ- Կեդրոնական վարչութեան փոխատենապետուհի ընկհ. Նայիրի Շահինեանի, ՀՅԴ Կեդրոնական Կոմիտէի ներկայացուցիչ ընկ. Զոհրապ Կոստանեանի, Գանատայի Ազգային Առաջնորդարանի ներկայացուցիչ ընկ. Յակոբ Պուկարեանի, «Հորիզոն» Շաբաթերթի խմբագիր ընկ. Վահաքն Գարագաշեանի, Հ.Մ.Ը.Մ-ի Շրջանային վարչութեան ներկայացուցիչ եղբ. Ռաֆֆի Հատիտեանի, Համաազգայինի Շրջանային վարչութեան ներկայացուցիչ ընկհ. Ծովիկ Գահվէճեանի, ՀՕՄ-ի Շրջանային վարչութեան լրիւ կազմին, մասնաճիւղերու վարչութեան ներկայացուցիչներու, 57 պատգամաւորներու և ՀՕՄ-ի հիւրերու և ազատ ունկնդիր ընկերուհիներու:

ՀՕՄ-ի Գանատայի Պատգամաւորական ժողովի դիւանի ատենապետուհիներ ընտրուեցան ընկերուհիներ Աննա Պուկարիան և Զեփիւռ Տորնա, ատենադպրուհիներ՝ ընկերուհիներ Անի Պապիկեան և Մարալ Յովհաննէսեան, բանաձեւի յանձնախումբի անդամ ընտրուեցան ընկերուհիներ՝ Սալբի Խրիկեան, Ազգանոյշ Հատիտեան և Զարուկ Հասրճեան:

Կազմակերպութիւններու ներկայացուցիչ հիւրերը յաջորդաբար ժողովին խօսք առնելով գնահատեցին 105-ամեայ ՀՕՄ-ի տարած աշխատանքը ի խնդիր ազգին, հայրենիքին և մարդկութեան: Գանատայի Հայոց Թեմի Առաջնորդ Գերշ. Տէր Մեղրիկ Եպս. Բարիքեան ողջունեց ժողովականները և շնորհաւորեց շրջանիս 25-ամեակը, ինչպէս նաեւ Շրջանային վարչութեան ընկերուհիներն ու ՀՕՄ-ի բոլոր անդամները, որոնք գիտակից նախանձախնդրութեամբ լեցուցած են կեանքը և զայն իրենց ծառայութեամբ գեղեցկացուցած: Ան մաղթեց որ ժողովուրդի պարծանքն ու հպարտութիւնը ներկայացնող ՀՕՄ-ը մնայ անոր գլխուն վերեւ, իր մատուցած ծառայութիւնը շողայ, պայծառանայ և բարգաւաճի:

Առաջին նիստի աւարտին ներկաները ուղղուեցան ՀՕՄ-ի Գանատայի Շրջանի 25-ամեակի ճաշկերոյթ-հանդիսութեան որ տեղի ունեցաւ «Buffet Chrystab»-ի մէջ:

Ժողովի երկրորդ նիստին ընկերուհի Նայիրի Շահինեան ներկայացուց ՀՕՄ-ի Կեդրոնական վարչութեան երեք տարուն գործունէութիւնը, ուր կը ցոլար տարուած հսկայական աշխատանքը: Կարճ դադարէ մը ետք ՀՕՄ-ի Գանատայի Շրջանային վարչութեան քարտուղար ընկհ. Անի Թաշճեան կարդաց երկամեայ գործունէութեան տեղեկագիրը ապա վարչութեան հաշուապահ ընկհ. Անի Օհանեան ներկայացուց հաշուական տեղեկագիրը:

Ժողովին մասնակից ընկերուհիները բարձր գնատեցին Շրջանային վարչութեան տարած հսկայական աշխատանքը: Նկատի ունենալով, որ Գանատայի շրջանի 25-ամեակը կը զուգադիպէր Հայոց Ցեղասպանութեան 100-ամեակին, ժողովը որոշեց նուիրել 25,000 տուար Գանատայի Հայ դատի աշխատանքներուն:

Կիրակի օր ժողովի երրորդ նիստին գլխաւոր օրակարգն էր Շրջանային վարչութեան նոր անդամներու ընտրութիւնը: Ընտրողական յանձնախումբը առաջարկեց թեկնածուներուն ցանկը, որ միացայնութեամբ ընդունուեցաւ: Շրջանային վարչութեան անդամ ընտրուեցան ընկերուհիներ՝ Անի Գրալեան (Մոնթրէալ), Վարդուկ Պեզճեան (Մոնթրէալ), Նաթալի Մանուկեան (Համիլթըն), Սիլվա Պէտրիեան (Թորոնթօ) որոնք եկան միանալու վերընտրելի ընկերուհիներ՝ Արմինէ Կարապետեանի (Մոնթրէալ), Անի Թաշճեանի (Մոնթրէալ) եւ Սիլվա Գարբուզեանի (Մոնթրէալ) այսպիսով ամբողջացնելու Շրջանային վարչութեան նոր կազմը: Ընկերուհիներ Մարալ Յովսէփեան (Լաւալ), Անի Պապիկեան (Մոնթրէալ) եւ Գեղուհի Պասթաճեան ( Թորոնթօ) ընտրուեցան որպէս փոխ անդամներ:

ՀՕՄ-ի Համահայկական պատգամաւորական Ժողովի պատգամաւորներ ընտրուեցան ընկերուհիներ՝ Աննա Պուկարեան (Մոնթրէալ), Անի Օհանեան (Լաւալ), Հուրի Նաճարեան (Թորոնթօ), Վարսենիկ Մարգիսեան (Թորոնթօ) եւ որպէս փոխ պատգամաւոր ընկերուհիներ Սեդա Մալխասեան (Մոնթրէալ) եւ Արփի Աճեմեան (Թորոնթօ):

Ներկաները շնորհաւորեցին եւ յաջողութիւն մաղթեցին Շրջանային վարչութեան նոր կազմին եւ համահայկականի պատգամաւորներուն: Ժողովականները մեծապէս գնահատեցին ժողովի դիւանի եւ բանաձեւի յանձնախումբի կատարած գործը, ինչպէս նաեւ բոլոր յանձնախումբերու ներդրումը: Ներկաները նաեւ գնահատեցին Մոնթրէալի եւ Լաւալի ընդլուծութեան միացեալ յանձնախումբի ճոխ հիւրասիրութիւնը:

Նիստերու աւարտին ՀՕՄ-ի Կեդրոնական վարչութեան փոխ ատենապետուհի ընկի. Նայիրի Շահինեան խօսք առնելով յիշեցուց 25 տարիներ առաջ կայացած առաջին ժողովի մարտահրաւերները եւ ընդգծեց թէ այդ օրերուն ինչպիսի լաւատեսութեամբ եւ ինքնավստահութեամբ ՀՕՄ-ուհիները կրցան աշխատիլ եւ յառաջ տանիլ միութեան աշխատանքները: Ան անդրադարձաւ մեր օրերուն, շեշտեց որ 25 տարիներ վերջ Գանատան դարձած է հպարտութեան աղբիւր, օրինակելի եւ բարձրօրէն գնահատուած շրջան: Ապա խօսք առաւ ՀՅԴ Կեդրոնական Կոմիտէի ներկայացուցիչ ընկ. Զոհրապ Կոստանեան եւ բարձր գնահատեց Գանատայի Շրջանի տարած բացառիկ գործունէութիւնը:

Եռօրեայ նիստերու աւարտին, ժողովականները նոր գաղափարներով եւ վերանորոգուած հոգիով վերադարձան իրենց մասնաճիւղերը շարունակելու իրենց վստահուած ՀՕՄ-ի սուրբ գործը: